

兵律-郵驛

『律』 238. 00遞送公文

1凡鋪兵遞送公文晝夜須行三百里稽留三刻答三十每三刻加一等罪止答五十其公文到鋪不問角數多少[鋪司]須要隨即[附籍遣兵]遞送不許等待後來文書違者鋪司答二十

2其鋪兵遞送公文若磨擦及破壞封皮不動原封者一角答二十每三角加一等罪杖六十若損壞公文[不動原封者]一角答四十每二角加一等罪止杖八十若沈匿公文及拆動原封者一角杖六十每一角加一等罪止杖一百若事干軍情機密文書[與漏泄不同]不拘角數即杖一百有所規避而沈拆者各從重論[避規罪重從規避沈拆罪重問沈拆]其鋪司不告舉者與犯人同罪若已告舉而所在官司不即受理施行者各減犯人罪二等

3其各縣鋪長專一於概管鋪分往來巡視提調官吏每月一次親臨各鋪刷勘若[有姦弊]失於檢舉者通計公文稽留及磨擦破壞封皮不動原封十件以上鋪長答四十提調吏典答三十官答二十若損壞及沈匿公文若拆動原封者[鋪長]與鋪兵同罪提調吏典減一等官又減一等府州提調官吏失於檢舉者各減一等

條例

238. 01

無印信文字不許入遞

238. 02

各省驛站遞送公文令管站官各立印信號簿上站號簿用下站官印於每月底彼此移明查考儻有沈匿稽延等情即行詳報該管上司據實題參不得故為容隱其沈匿平常公文馬夫照鋪兵律治罪提調官吏依律遞減若事干軍情機密文書而沈匿者不計角數馬夫杖六十徒一年提調吏典杖一百革役司驛官革職如有所規避者從重論

238. 03

凡軍臺文報如有將有報匣夾板及兵部加封事件擅敢拆動以致漏洩事情者該管大臣立即查究供證明確無論官兵馬夫即按軍法從事[按此指題奏摺報而言吏部則例係往來摺報]其專管臺站文武員弁革職拏問管轄臺站大員交部議處至軍營來往文移札稟有關軍需糧餉調遣兵馬及陞調參革官員等項[按此指文移札稟而言處分例同]發遞時俱用釘封鈐蓋印信如臺站書吏人等私自拆閱者查出究明問擬滿流臺站官弁交部分別議處

238. 04

刑部咨行各省立決人犯公文俱釘封嚴固封面註明件數並由馬上飛遞字樣派筆帖式一員送交兵部加封發驛馳遞

238. 05

馬上飛遞公文如有遺失除將馬夫照例治罪外該地方官一面詳報該管上司一面徑報原發衙門查核補給

『律』 239. 00邀取實封公文

1凡在外大小各衙門官但有入遞進呈實封公文至御前[下司被上司非理陵虐亦許據實封奏]而上司官令人於中途急遞鋪邀截取回者不拘遠近從本鋪鋪司鋪兵赴所在官司告舉隨即申呈上司轉達該部奏聞追究[邀截之情]得實斬[監候][邀截進表文比此]其鋪司鋪兵容隱不告舉者各杖一百若已告舉而所在官司不即受理施行者罪亦如之

2若邀取實封至六部察院公文者各減二等[下司畏上司劾奏而邀取者比此]

『律』 240. 00鋪舍損壞

凡急遞鋪舍損壞不為修理雜物不完鋪兵數少不為補置及令老弱之人當役者鋪長答五十有司提調官吏各答四十

條例

240. 01

急遞鋪每一十五里設置一所每鋪設鋪兵四名鋪司一名於附近有丁力糧近一石之上二石之下者點充須要少壯正身與免雜泛差役每鋪置備各項雜物十二時輪日晷牌子一箇紅綽屑一座並牌額鋪冊二本[上司行下一本各府申上一本]遇夜常明燈燭鋪兵每名合備雜物夾板一副鈴襜一副纓鎗一副油絹三尺軟絹包袱一條箬帽簑衣各一件紅悶棍一條回冊一本

『律』 241. 00私役鋪兵

凡各衙門一應公差人員[於經過所在]不許差使鋪兵挑送官物及私己行李違者答四十每名計一日追雇工銀八分五釐五毫入官

『律』 242. 00驛使稽程

1凡出使馳驛違限常事一日答二十每三日加一等罪止杖六十軍情重事加三等因而失誤軍機者斬[監候]若各驛官故將好馬藏匿[及]推故不即應付以致違限者對問明白[即以前應得答杖斬]罪坐驛官其遇水漲路道阻礙經行者不坐

2若驛使承受官司文書誤不依[原行]題寫[所在公幹]去處錯去他所而違限者減二等[四日答一十每三日加一等罪止答四十]事干軍務者不減若由[原行]公文題寫錯者罪坐題寫之人驛使不坐

條例

242. 01

凡官員因軍務差遣及自軍前赴京齋奏軍情儻經過地方不照依勘合火牌糧單隨即供應驛馬廩給不為預備公館以致遲誤者按遲誤事情巨細將本城長官及所派催辦驛馬糧餉官俱題參交部察議擬罪若長官他出不在本城而有遲誤者其委託怠玩亦不得免罪仍交部察議

242. 02

凡齋奏不騎驛馬違限十日以內者免罪十日以外係常事答三十密事答四十

242. 03

各處水馬驛遞運所夫役鋪兵及巡檢司弓兵若有用強包攬不容正身著役多取工錢致將公文稽遲沉匿及攪擾衙門者發附近充軍其官吏鋪長通同縱容者各照違制律治罪失於覺察者交部議處若不曾用強多取工錢者不在此例[多取工錢問求索計贓以不枉法論]

『律』 243. 00多乘驛馬

1凡出使人員應乘驛船驛馬數外多乘一船一馬者杖八十每一船一馬加一等若應乘驢而乘馬及應乘中等下等馬而勒要上等馬者杖七十因而毆傷驛官者各加一等[至折齒以上依鬥毆論]若驛官容情應付者各減犯人罪一等其應乘上等馬而驛官卻與中等下等馬者罪坐驛官本驛如無上等馬者勿論

2若[出使人員]枉道馳驛及經驛不換船馬者杖六十因而走死驛馬者加一等追償馬匹還官

3其事非緊急不曾枉道而走死驛馬者償而不坐

4若軍情緊急及前驛無船馬倒換者不坐不償[亦究不倒換緣由]

條例

243. 01

勘合之外如敢多給一夫一馬許前途州縣據實揭報都察院糾參儻容情不揭別經揭報一併治罪其差使至境硬派民間牲口者照違例妄索民夫例該管官揭報督撫提參審明後分別議處治罪

243. 02

凡指稱勳戚文武大臣近侍官員姻黨族屬家人名目虛張聲勢擾害經過軍衛有司驛遞衙門占宿公館索取人夫馬匹車輛財物等項及姦徒詐稱勢要衙門乘坐黑樓等船隻懸掛牌面希圖免稅誑騙違法者徒罪以上俱於所犯地方枷號一箇月發近邊充軍杖罪以下枷號一箇月發落[索取財物問求索希圖免稅問匿稅誑騙違法問詐稱見任官家人於所部內得財]

243. 03

凡馳驛官員縱容差官跟役毆罵驛官驛夫或並無急務走死驛馬並額馬既足故行越站以及索詐財物者該地方官驛官一面申詳上司一面具報該部察究得實官員革職差官人等拏送刑部從重治罪若無勘合火牌謊稱公差支取夫馬船隻及索詐財物者亦俱拏送刑部從重治罪其不照依所定程途枉道擾驛者係官交該部議處差役杖一百

243. 04

水驛一應差船如有派撥埠頭扣剋官價入己者計贓照侵盜錢糧例問擬各衙門鄉親來往並書吏人等濫捉民船輒用旗鎗燈籠假借本管官官衙者照無官而詐稱有官律杖一百徒三年

『律』 24. 400多支廩給

凡出使人員多支領廩給者計贓以不枉法論[分有祿無祿]當該官吏與者減一等強取者以枉法論官吏不坐[多支口糧比此]

條例

244. 01

各處地方如遇外國人入貢經過驛遞即便察照勘合應付不許容令買賣連日支應違者按律治罪

『律』 245. 00文書應給驛而不給

1凡朝廷調遣軍馬及報警急軍務至邊將若邊將及各衙門飛報軍情詣朝廷[實封]文書故不遣使給驛[而入遞]者杖一百因而失誤軍機者斬[監候]

2若進賀表箋及賑救饑荒申報災異取索軍需之類重事故不遣使給驛者杖八十[失誤軍機仍從重論]若常事不應給驛而故給驛者笞四十

『律』 246. 00公事應行稽程

凡公事有應起解官物囚徒畜產差人管送而輒稽留及一切公事有期限而違者一日笞二十每三日加一等罪止笞五十若起解軍需隨征供給而管送[兼稽留]違限者各加二等罪止杖一百以致臨敵缺乏失誤軍機者斬[監候]若承差人誤不依題寫去處錯去他所以致違限者減[本罪]二等事干軍務者不減[或笞或杖或斬照前科罪]若由公文題寫錯[而違限]者罪坐題寫之人承差人不坐

條例

246. 01

夫役工匠人等遇有緊要差使傳集公所立待應用如不遵官長約束為匪不法逞刁挾制因而率眾颺散以致誤差審明為首者擬斬監候為從垣枷號一箇月杖一百儻係偶爾違禁干犯賭博鬥毆等事並未挾制官長颺散誤差者仍按本律治罪

『律』 247. 00 占宿驛舍上房

凡公差人員出外幹辦公事占宿驛舍正廳上房者笞五十[正廳上房待品官上客]

『律』 248. 00 乘驛馬齎私物

凡出使人員應乘驛馬除隨身衣[服器]仗外齎帶私物者十斤杖六十每十斤加一等罪止杖一百驛驢減一等[所帶]私物入官[致死驛馬者依本律]

條例

248. 01

奉差員役至頭站時該驛員即將應背之包稱准斤數開明印單遞送前途其每夜住宿之站該驛員詳加查估如果照例裝載即於印單填寫某站驗明並無重包字樣日間所過驛站驗單應付如前站徇隱重包經後站察出詳報該差員役照律治罪徇隱驛員一併議處

248. 02

積慣漁利姦商寄託年班進京回子夾帶私貨者除數在五百斤以內仍照舊律分別擬杖外如數至六百斤杖六十徒一年每百斤加一等罪止杖一百流三千里貨物照律入官

『律』 249. 00 私役民夫檣轎

1 凡各衙門官吏及出使人員役使人民檣轎者杖六十有司應付者減一等若豪富[庶民]之家[不給雇錢以勢]役使佃客檣轎者罪亦如之每名計一日追給雇工銀八分五釐五毫

2 其民間出錢雇工者不在此限

條例

249. 01

凡內府官員執事之人及各部院衙門官員人等並無印信憑據詐欺索取民夫等項該地方官即行拘拏一面申報該督撫具題一面申報該部審實係官革職係領催執事人等拏送刑部從重治罪拏首之地方官交部議敘

249. 02

凡兵部勘合欽差大臣及督撫入境學差試差知府下縣盤查及他縣奉督撫差委盤查者准其動用民夫其餘概不准用儻有違例妄索者著該管官即行揭報督撫題參若該管官違例濫應發覺之日照例治罪

『律』 250. 00 病故官家屬還鄉

凡軍民官在任以理病故家屬無力不能還鄉者所在官司差人管領應付[車船夫馬]腳力隨程驗[所有家]口官給行糧遞送還鄉違而不送者杖六十

條例

250. 01

縣丞以下等官參革離任或告病身故實係窮苦不能回籍者該督撫於存公項內酌給還鄉路費每年造冊報銷

『律』 251. 00承差轉雇寄人

1凡承差起解官物囚徒畜產不親管送而雇人寄人代領送者杖六十因而損失官物畜產及失囚者依[本律各從重論[損失重問損失輕則仍科雇寄]受雇受寄人各減[承差人]一等

2其同差人自相替者放者各答四十取財者[承替取放者貼解之物]計贓以不枉法論若事有損失者亦依損失官物及失囚律追斷不在減等之限[若侵欺故縱各依本律替者有犯管送人不知情不坐]

條例

251. 01

起解人犯每名選差的役二名管押兵丁二名護送若兵役派不足數及雇人代解許兵役互相稟報本管官知會原派衙門查究補派若兵役知而不舉將兵役及承派之書吏弓兵俱杖一百革役其經由前途文武各官按批查點有缺少及代解等弊即詳報督撫將原派官弁參處其缺少頂替之兵役照承差起解囚徒雇人代送律杖六十革役如前途各官隱匿不報別經發覺題參議處

『律』 252. 00乘官畜產車船附私物

1凡因公差應乘官馬牛駝羸驢者[各衙門自撥官馬不得馳驛而行者]除隨身衣仗外私駝物不得過十斤違者五斤答一十每十斤加一等罪止杖六十[不在乘驛馬之條]

2其乘船車者私載物不得過三十斤違者十斤答一十每二十斤加一等罪止杖七十家人隨從者不坐若受寄私載他人物者寄物之人同罪其物並入官當該官司知而容縱者與同罪不知者不坐若應合遞運家小[如陣亡病故官軍及軍民官在任以理病故]者[雖有私帶物件]不在此限

條例

252. 01

漕船旗丁每船准帶土宜一百石頭舵二人每人准帶三石水手無論人數准其共帶二十石其回空船隻舵水人等准帶梨棗六十石沿途過淺盤剝責令自備腳價例外多帶者照數入官監兌糧儲等官水次先行搜檢督押糧道及府佐官員沿途稽查經過儀徵淮安天津等處聽趨運鎮道官盤詰經盤官員徇情賣法一併參治[多帶問違制徇情賣法問聽從囑託事已施行受財問枉法出錢之人問行求]

252. 02

漕運船隻除運軍自帶土宜貨物外若附搭客商勢要人等酒麵糯米花草竹木板片器皿貨物者將本船運軍並附載人員依律治罪貨物入官其押運官有犯交部議處[附載人員依違制運軍與運官有贓問枉法無贓止問違制]

252. 03

沿河一帶陞除外任及內外公差官員若有乘坐在官船隻[一事]興販私鹽[二事]起撥人夫[三事]並帶去無籍之徒辱罵鎖綁官吏勒要銀兩者督撫巡河巡鹽管河管閘等官即便拏問干礙應奏官員奏請提問其軍衛有司驛遞衙門若有懼勢應付者參究治罪[三事不備不引此例止一事依本律論]

『律』 253. 00私借驛馬

凡驛官將驛馬私自借用或轉借與人及借之者各杖八十驛驢減一等驗[計]日追雇賃錢入官若計雇賃錢重[於私借之罪]者各坐贓論加二等